

## Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

## यूहन्ना क पहिली पत्र

१ इ दुनिया क सुरुआत स रहा : हम एका सुने अही अपनी आंखन स देखे अही अउर बहुत धियान स निहारे, एका अपने हाथन स खुदइ छुए अही। हम उ बचन (मसीह) क बावत बतावत अही जउन जीवन अहइ। २ उही जीवन क ज्ञान हमका करावा गवा। हम ओका देखे अही। हम ओकर साच्छी अही अउर अब हम तोहका पचे क उही अनन्त जीवन क घोसणा करत अही जउन परमपिता क साथे रहा अउर जेकर जानकारी हमका कराई गइ। ३ हम ओका देखे अउर सुने अही। अब तोहका उही क उपदेस देत अही जइसेन कि तू हमार साथी रहा। हमार इ साथ परमपिता अउर ओनकइ पूत ईसू मसीह क साथे अहइ। ४ हम इ सब बात तोहरे बरे इ कारण स लिखत अही जइसेन कि तोहार आनन्द पूरा होइ जाइ।

परमेस्सर हमरे पापन क छमा करत ह

५ हम ईसू मसीह स जउन सुसमाचार सुने अही, उही क हम तोहका सुनावत अही, परमेस्सर ज्योति अहइ अउर ओहमा तनिकउ अंधेरा नाही अहइ। ६ जदि हम कही कि ओके सहित हमार सहभागिता अहइ, अउर पाप क अंधियारे स भरा जीवन जिअत रही तउ हम झूठ बोलत अही अउर सच्चाई प आचरण नाही करत अही। ७ मुला जदि हम ज्योति मँ आगे बढ़ित अही काहेकि ज्योति मँ परमेस्सर अहइ, अउर एक दुसरे क सहभागी अही। अउर परमेस्सर क पूत ईसू क लहू स हमार सब पापन क सुद्ध कइ देत ह।

८ जदि हम कहित ह कि हमरे मँ कउनो पाप नाही अहइ तउ हम खुदइ अपने आपका ठगत अही अउर हमसे परमेस्सर क सत्य नाही अहइ। ९ जदि हम आपन पाप क मान लेइत ह तउ हमरे पापन क परमेस्सर छमा कइ देत ह, परमेस्सर बिस्वासनीय अहइ, अउर उ जउन करत ह उ उचित अहइ। अउर उ हमरे गलत कामन स सुद्ध कर देत ह। १० अगर हम कहित ह कि हम कउनो पाप नाही करे अही तउ हम परमेस्सर क झूठा बतावत अही अउर ओकर उपदेस हमरे मँ नाही अहइ।

ईसू हमार सहायक अहइ

१ मोर पिआरे बच्चो, इ सब बात मई इ बरे लिखत अहउँ जइसे तू पचे पाप न करा। मुला जउ कउनो मनई पाप करत ह तउ परमेस्सर क सामने हमरे पाप क बचाव करइवाला एक अहइ अउर उ बाटइ न्यायी ईसू। २ उ एक बलिदान बाटइ जउन हमरे पापन क हर लेत ह, उ केवल हमरे पापन क नाही हरत उ तउ समूची दुनिया क पाप हर लेत ह।

३ जदि हम परमेस्सर क हुकुम क पालन करित ह तउ इ उहइ रास्ता अहइ जउने स हम निस्चय करित ह कि हम सचमुच ओका जान लिहे अही।

४ जदि कउनो कहत ह, “मई परमेस्सर क जानित हउँ!” अउर ओकर हुकुमन क पालन नाही करत तउ उ झूठा अहइ। ओकरे मन मँ सच्चाई नाही अहइ। ५ मुला जउ कउनो मनई परमेस्सर क उपदेस क पालन करत ह तउ ओहमाँ परमेस्सर क परिम आपन पूर्णता क पावत ह इहइ उ रास्ता अहइ जउने स इ निस्चय होत ह कि हम परमेस्सर मँ अही, ६ जउन इ कहत ह कि उ परमेस्सर मँ बाटइ, ओका अइसा चलइ चाही जइसन ईसू चलत रहा।

सबसे परिम कर

७ पिआरे बन्धुअन, मई तोहका कउनो नई हुकुमन नाही लिखत अहउँ, इ तउ एक सनातनी हुकुम अहइ, जउन तोहका सुरुआतइ मँ दइ दीन्ह गइ रही। इ पुरानी हुकुम उ उपदेस अहइ जेका तू सुन चुका अहा। ८ मई तोहका अउर दुसर नया हुकुम लिखत अहउँ। इ बात की सच्चाई ईसू क जीवन मँ अउर तोहरे जिन्दगी मँ उजागर भइ अहइ, काहेकि अंधियारा खतम होत अहइ अउर ज्योति चमकत अहइ।

९ जउन मनई कहत ह, “उ ज्योति मँ स्थित अहउँ।” अउर तबहूँ अपने भाई स नफरत करत ह, तउ उ अबहि भी उ अंधेरे मँ बना अहइ। १० जउन अपने भाई स परिम करत ह, ज्योति मँ बना रहत ह। ओकरे जिन्दगी मँ अइसी कउनो चीज नाही अहइ, जउने स उ टोकर खाइ। ११ मुला जउन मनई अपने भाई स नफरत करत ह, उ अंधेरे मँ अहइ। उ अंधेरे स भरा जीवन जिअत अहइ। ओका पता नाही अहइ कि उ कहाँ जात अहइ, काहेकि अंधेरा ओका आंधर बनाइ दिहे अहइ।

१२ पिआरे बच्चो, मई तोहका इ बरे लिखत अहउँ,

काहेकि ईसू मसीह क कारण तोहरे पापन क छमा कइ दीन्ह गवा अहइ।

१३ पिताओ, मई तोहका इ बरे लिखत अहउँ, काहेकि तू पचे, जउन अनादि काल स बना अहइ, ओका जानत ह्या।

जवानो! मई तोहका इ बरे लिखत अहउँ, काहेकि तू उ दुस्ट (सइतान) प जीत हासिल कइ लिह्या ह।

१४ बच्चो, मई तोहका इ बरे लिखत अहउँ, काहेकि तू अपने बाप क पहचान लिहे अहा। ओह बाप लोगो, मई तोहका इ बरे लिखत अहउँ, काहेकि तू जउन कि संसार क सुरुआतइ स बना अहा, ओका जान लिहे अहा।

जवानो, मई तोहका इ बरे लिखत अही, काहेकि तू ताकतवर अहा। परमेस्सर क बचन तोहरे अन्दर निवास करत ह, अउर उ दुस्ट (सइतान) पइ जीत हासिल कइ लिये अहा।

१५ दुनिया स अउर दुनिया क तमाम चीजन स परिम जिन करा। जउ कउनो मनई दुनिया स परिम करत ह तउ ओनके हिरदइ मँ परमेस्सर कइती परिम नाही रहत, १६ काहेकि इ दुनिया क हर चीज: जउन तोहरे भौतिक मनई सुभाउ क अपनी अउर खींचत ह, तोहरी आँखिन क सोहात अउर इ दुनिया क हर उ चीज जउने प लोग घमंड करत हीं। परमपिता कइती स नाही अहइ मुला उ तउ सांसारिक अहइ। १७ इ दुनिया अपनी चाहत अउर इच्छा सहित खतम होत जात अहइ, मुला जउन मनई परमेस्सर क इच्छा क पालन करत ह, उ हमेसा रहत ह।

मसीह क विरोधिअन क कहा न माना

१५ मोरे पिआरे बच्चो, आखिरी घडी आइ गइ अहइ जइसेन कि तू पचे सुने अहा, मसीह क विरोधी आवत अहइ। इ बरे अब मसीह क तमाम विरोधी प्रकट होइ गवा अहइ इही बरे हम जानत अही कि आखिरी वक्त आइ ग अहइ। १६ मसीह क विरोधी हमरेन सबके बीच स निकरा अहइ, मुला उ सबइ सही हमार सबन क न अही, काहेकि जदि उ पचे सचमुच हमार सबन क होतेन, तउ हमरे सबके साथे रहतेन। मुला उ पचे हम सबक छोड़ दिहेन, जइसेन कि उ दिखाइ सकइ कि उ हमार सबन्क न अही।

२० मुला तोहार अभिसेक तो उस पवित्तर स भवा ह, अउर तू सब जानत ह्या। २१ मई तोहका इ बरे नाही लिखे अहउँ कि तू पचे सच्चाई क नाही

जानत अहा, मुला तू पचे तउ ओका जानत अहा। एका जना ल्या कि सच्चाई स कउनो झूठ नाही निकर सकत।

२२ मुला जउन मनई कहत ह कि ईसू मसीह नाही अहइ, उ मसीह क विरोधी अहइ। उ तउ बाप अउर बेटवा दुइनउ क नकार देत अहइ। २३ जउन मनई बेटवा क नाही मानत, ओकरे पास बापउ नाही अहइ, मुला जउन मनई बेटवा क मानत ह, उ बापउ क मानत ह।

२४ जहाँ तलक तोहार बात अहइ, तु सुरुआतइ स जउन सुने अहा, ओका अपने भीतर बनाए राखा। जउन तू आरम्भ स सुने अहा, जउ तोहरे अन्दर बरकरार रहत ह तउ बाप अउर बेटवा दुइनउ तोहरे अन्दर बरकरार रहत हीं। २५ उ हमका अनन्त जीवन देइ क वचन दिहे अहइ।

२६ मई इ सब बात तोहसे ओनके बावत लिखत अहउँ, जउन तोहका टगइ क जतन करत अहइ। २७ मुला जहाँ तक तोहार बात अहइ, तोहरे मँ तउ उ परम पवित्तर स मिला अभिसेक अहइ, इ बरे तोहका तउ तू जरूरतइ नाही अहइ कि कउनो तोहका उपदेस देइ, तोहका तउ उ आतिमा जउने स उ परम पवित्तर तोहार अभिसेक करे अहइ, सब कछू सिखावत अहइ (अउर याद रखा कि उहइ सच्चाई बाटइ, उ झूठ नाही बाटइ।) उ तोहका जइसे सिखाए अहइ, वइसेन तू मसीह मँ बना रहा।

२८ इ बरे पिआरे बच्चो, उही मँ बना रहा जइसेन कि जब हमका ओकर जानकारी होइ तउ हम आतिमा-बिसवास पाइ सकउँ। अउर ओकरे फिन स आवइ क वक्त हमका लज्जित न होइ क पइइ। २९ जदि तू इ जानत अहा कि उ नेक अहइ तउ तू इहइ जान ल्या कि जउन नेकी प चलत ह उ परमेस्सर क सन्तान अहइ।

हम परमेस्सर क सन्तान अही

३ इ सोचिके देखा कि परमपिता हमका केतना परिम करत ह जइसेन कि हम पचे बेटी-बेटवा कहवावा जाइ सकी अउर वास्तव मँ उ हमहिं सब अही। इही बरे दुनिया हमका नाही पहिचानत, काहेकि उ मसीह क नाही पहिचानत। २ पिआरे बन्धुअन, अब हम परमेस्सर क सन्तान अही, मुला आगे चलिके हम सब का होबै, एकर जानकारी हमका नाही कराई गइ अहइ। जउन कछू होइ, हम इ जानित अही कि मसीह क फिन परगट होइ प हम पचे उही क तरह होइ जाव, काहेकि उ जइसेन अहइ, हम ओका उही तरह देखब।

३ जउन मनई ओसे अइसी उम्मीद रखत अहइ, उ खुदक वइसे पवित्र करत ह जइसे मसीह पवित्र अहइ।

४ जउन मनई पाप करत ह, उ परमेस्सर क नियम क तोड़त ह, काहेकि नियम क तोड़ब पाप बाटइ। ५ तू तउ जानत अहा कि मसीह सब मनइयन क पाप क नास करइ क वास्ते प्रकट भवा अहइ। अउर इहउ बात जानत अहा कि ओहमाँ कउनो पाप नाही अहइ। ६ जउन मनई मसीह मँ रहत ही पाप मँ नाही रहतेन अउर जउन मनई पाप करत ही, उ न तउ ओकर दर्सन करे अहइ, अउर न तउ कबहूँ ओका जाने अहइ।

७ पिआरे बच्चो, तू कतहूँ टगा न जा। जउन मनई धरम क पालन करत ह ओका धरमात्मा कहा जात ह। जइसेन कि मसीह धरमात्मा अहइ। ८ जउन मनई हमेसा पाप करत रहत ह, उ सइतान क अहइ काहेकि सइतान अनादिकाल स पाप करत चलत आवत अहइ। इही बरे परमेस्सर क पूत (मसीह) परगट भवा जइसेन कि उ सइतान क काम क नास कइ देइ।

९ जउन मनई परमेस्सर क बेटवा बन गवा, पाप मँ नाही रहत, काहेकि ओकर बीज तउ उही मँ रहत ह। अब उ पाप नाही करत काहेकि वह परमेस्सर क बेटवा बन चुका अहइ। १० परमेस्सर क सन्तान कउन अहइ? अउर सइतान क बेटवन कउन अहइ? तू ओनका इ तरीके स जान सकत ह्या कि जउन मनई धरम प नाही चलत अउर अपने भाई स पिरेम नाही करत, उ परमेस्सर क बचवा न अहइ।

एक दूसरे क साथ पिरेम स रहा

११ इ उपदेस तउ तू सुरूआति स सुने अहा कि हमका सबका एक दुसरे स पिरेम करइ चाही। १२ हमका पचे क केन क तरह न बनइ चाही जउने क सम्बन्ध दुस्ट आतिमा स रहा अउर जे अपने भाई क हतिया कइ दिहे रहा। अब बतावा कि उ अपने भाई क काहे मार डाएस? उ अइसा इ बरे करेस, काहेकि ओकर करम खराब रहेन जबकि ओकरे भाई क करम अच्छा रहेन।

१३ भाइयो तथा बहिनियो, जदि इ दुनिया तोहसे नफरत करत ह, तउ एहमाँ अचरज करइ क बात नाही अहइ। १४ हमका पता अहइ कि हम मउत क पार जीवन मँ आइ पहुँचा अहइ। काहेकि हम अपने भाइयन स पिरेम करित अही। जउन मनई पिरेम नाही करत, उ मउत मँ बरकरार रहत ह। १५ जउन मनई अपने भाई स नफरत करत ह, उ

हतियारा अहइ अउर तू जानत ही अहा कि जउन मनई हतियारा होत ह, उ अनन्त जीवन नाही रखत।

१६ ईसू हमरे सबके खातिर आपन जीवन त्याग दिहेस। इही बरे कि हम जानित ह कि पिरेम का होत ह? हमका अपने भाइयन क बरे आपन पुरान निछावर कइ देइ चाही। १७ जेकरे लगे भौतिक सम्पति अहइ, अउर जे अपने भाइयन क दुःखी देखके ओकरे ऊपर दया नाही करत, ओहमा परमेस्सर क पिरेम अहइ, एका कइसे कहा जाइ सकत ह? १८ पिआरे बच्चो, हमार पिरेम केवल कथन अउर बात तक न रहइ चाही, ओका करम कइके देखावइ चाही तथा पिरेम क सच्चा होइ चाही।

१९-२० इही स हम जान लेब कि हम सच्चाई स जुड़ा अही अउर परमेस्सर क सामने अपने दिल मँ सन्तोस कइ लेब। जिन कामन मँ हमार मन हमका दोसी ठहरावत ह काहेकि परमेस्सर हमरे मन स बड़ा अहइ अउर उ सब कछू जानत ह।

२१ जो पिआरे बन्धुओ, जदि बुरा काम करत समइ हमार मन हमका दोसी नाही ठहरावत तउ परमेस्सर क सामने हमका बिसवास बना रहत ह। २२ अउर जउन कछू हम ओसे मांगित ह, ओका पाइत ह। काहेकि हम ओकरे हुकुमन क अनुसार काम करत अही अउर ओनही काम करत अही जउन ओका अच्छी लागत ह। २३ ओकर इ हुकुमन अहइ : हम सबे ओकरे पूत ईसू मसीह मँ बिसवास करी, जइसेन कि उ हमका पचे क हुकुम दिहे अहइ, कि हम एक दुसरे स पिरेम करी, २४ जउन मनई ओकरे आदेस क पालन करत ह, उ उही मँ बरकरार रहत ह अउर ओहमाँ परमेस्सर क निवास रहत ह। इ तरह स, उ आतिमा क द्वारा जेका परमेस्सर हमका दिहे अहइ, हम जानितही कि हमरे अन्दर परमेस्सर रहत ह।

झूटा उपदेस देय बालेन स बचा रहै चाही

१ पिआरे बन्धुओ, दुनिया मँ तमाम झूठे नवी फैल ग अहइ। हर एक आतिमा क बिसवास न करइ चाही, पहले ओनका परखिके देख लेइ चाही कि का उ परमेस्सर क अही? इ मइँ तोहसे इ बरे कहत अही। २ परमेस्सर क आतिमा क तू इ तरह पहिचान सकत ह्या : जउन आतिमा इ मानत ह, "ईसू मसीह मनई क रूप धइके दुनिया मँ आइ अहइ," उ परमेस्सर कइँती स आइ अहइ। ३ अउर हर उ आतिमा जउन ईसू क नाही मानत, परमेस्सर कइँती स नाही आइ बाटइ। अइसी

आतिमा मसीह क विरोधी अहइ, जेकरे बारे में सुने अहा कि उ आवत अहइ, मुला अब तउ उ इही दुनिया में अहइ।

४ पिआरे बच्चो, तू पचे परमेस्सर क अह्या। इही बरे तू मसीह क विरोधी क ऊपर जीत हासिल कइ लिहे अहा। काहेकि उ परमेस्सर जउन तोहरे अन्दर अहइ, दुनिया में रहइवाला सइतान स बड़ा अहइ। ५ मसीह क विरोध करइवाले मनइयन संसारी अही। एह बरे उ पचे जउन कछू बोलत हीं, उहउ सब कछू दुनियादारी क चीज अहइ अउर दुनिया ओनकइ बात सुनत ह। ६ मुला हम पचे परमेस्सर क अही, तउ जउन मनई परमेस्सर क जानत ह, उ हमार सबन क सुनत ह। मुला जउन मनई परमेस्सर क नाहीं जानत, हमार नाहीं सुनत। इ तरह हम सच्ची आतिमा तथा झूठी आतिमा क पहिचान सकित ह।

पिरेम परमेस्सर स मिलत ह

७ पिआरे बन्धुओ, हमका सबका एक दूसरे स पिरेम करइ चाही। काहेकि पिरेम परमेस्सर स मिलत ह अउर जउन मनई पिरेम करत ह, उ परमेस्सर क सन्तान बन जात ह अउर परमेस्सर क जानत ह। ८ जउन मनई पिरेम नाहीं करत परमेस्सर क नाहीं जान पावत, काहेकि परमेस्सर पिरेम अहइ। ९ परमेस्सर आपन पिरेम इ तरह स देखावत ह: उ अपने एकलौते बेटवा क इ दुनिया में भेजेस जइसेन कि हम सब ओकरे द्वारा जिन्दगी पाइ सकी। १० सच्चा पिरेम एहमाँ नाहीं अहइ कि हम परमेस्सर स पिरेम करी, उ तउ एहमाँ अहइ कि एक अइसेन बलिदान क रूप में जउन हमरे पापन क धारण कइ लेत ह, उ अपने बेटवा क भेजेके हमरी कइती आपन पिरेम देखाए अहइ।

११ पिआरे बन्धुओ, जदि परमेस्सर इ तरह स हमरे ऊपर आपन पिरेम देखाए तउ हमहूँ क एक दूसरे स पिरेम करइ चाही। १२ परमेस्सर क कबहुँ कउनो नाहीं देखेस अहइ, मुला जदि हम एक दुसरे स पिरेम करित ह तउ परमेस्सर हमरे में निवास करत ह अउर हमरे सबन क भीतर ओकर पिरेम सम्पूर्ण होइ जात ह।

१३ इ तरह स हम जान सकित ह कि हम परमेस्सर में निवास करित ह अउर उ हमरे भीतर रहत ह। उ अपनी आतिमा क कछू भाग हमका दिहे अहइ। १४ एका हम देखे अही अउर हम एकर साच्छी अही, परमपिता अपने बेटवा क दुनिया क बचाव करइ क वास्ते भेजे अहइ। १५ जदि कउनो इ मानत

लेत ह, "ईसू परमेस्सर क पूत अहइ" तउ परमेस्सर ओहमाँ रहइ लागत ह। अउर उ मनई परमेस्सर में रहत ह। १६ इ जउ पिरेम परमेस्सर हमसे रखत ह, ओका हम जान गाएँ अउर हमरे उपर बिसवास किहे अहइ, जउन पिरेम परमेस्सर हमरे बरे रखत ह।

परमेस्सर पिरेम अहइ अउर जउन मनई पिरेम में बना रहत ह, उ परमेस्सर में बना रहत ह अउर परमेस्सर ओहमाँ बना रहत ह। १७ हमरे बावत पिरेम इही तरह स पूर्ण अहइ जइसेन कि निआव क दिन हमरे अन्दर बिसवास बना रहइ। हमार इ बिसवास इ बरे बना रहत ह, काहेकि हम जउन जीवन जिअत अही, उ मसीह क जिन्दगी जइसेन अहइ। १८ पिरेम में कउनो भय नाहीं रहत, हिआँ तलक कि भरपूर पिरेम सब डर भगाय देत ह। भय क ताल्लुक दंड स अहइ। इ बरे जेहमाँ भय अहइ, ओकरे पिरेम क पूर्णता नाहीं मिलत।

१९ हम पिरेम करित अही काहेकि पहले परमेस्सर हमसे पहिले पिरेम करे अहइ। २० जउ कउनो मन मनई कहत ह, "मई परमेस्सर क पिरेम करित हउँ।" अउर अपने भाई स नफरत करत हउँ, तउ उ झूठा अहइ। काहेकि सच में जदि उ अपने उ भाई स पिरेम नाहीं करत जेका कि उ देखे अहइ, तउ उ परमेस्सर स कइसे पिरेम कइ सकत ह, जेका उ देखे नाहीं अहइ। २१ इ आदेस मसीह हमका दिहे अहइ। उ मनई जउन परमेस्सर क पिरेम करत ह, ओका अपने भाई स पिरेम करइ चाही।

परमेस्सर क सन्तान क दुनिया प जीत होत ह

२२ जउन मनई इ बिसवास करत ह कि ईसू मसीह अहइ, उ परमेस्सर क सन्तान बन जात ह अउर जदि कउनो परमपिता स पिरेम करी तउ ओकरी सन्तानी स पिरेम करी। २३ इ तरह स जब हम परमेस्सर स पिरेम करित ह अउर ओकरे आदेस क पालन करित अही तउ हम जानि लेइत ह कि हम परमेस्सर क संतान स पिरेम करित अही। २४ ओकरे आदेसन क पालन करत हम इ देखाइत ह कि हम परमेस्सर स पिरेम करित ह। ओकरे आदेस बहुत कड़ा नाहीं अहइ। २५ काहेकि जउ कउनो परमेस्सर क सन्तान बन जात ह तउ उ दुनिया क जीत लेत ह। अउर दुनिया प जीत हासिल करवइवाला हमार बिसवास अहइ। २६ जउन इ बिसवास करत ह कि ईसू परमेस्सर क पूत अहइ, तउ उ दुनिया क जीत लेत ह।

परमेस्सर अपने पूत क बावत कहब

६ उ ईसू मसीह अहइ जउन हमरे पास पानी अउर लहू क साथ आवा-उ केवल पानी क साथे नाही, मुला पानी अउर लहू क साथ। अउर उ आतिमा अहइ जउन ओकर साच्छी देत ह, काहेकि आतिमा सत्य अहइ।<sup>७</sup> साच्छी देइवाले तीन अहई।<sup>८</sup> आतिमा, पानी अउर लहू अउर इ तीनउँ साच्छी एक दूसरे स मेल खात ही, एक दूसरे स सहमत अहई।

१ जउ हम मनई क दीन्ह साच्छी क मानित ह तउ परमेस्सर क दीन्ह साच्छी अउर मूल्यवान अहइ। परमेस्सर क दीन्ह साच्छी क सबसे बड़ा महत्व इ बात मँ अहइ कि उ अपने पूत क बावत साच्छी दिहे अहइ।<sup>१०</sup> जउन मनई परमेस्सर क पूत मँ बिसवास करत ह उ अपने अन्दर साच्छी क रखत ह। परमेस्सर जउन कहे अहइ, ओह प जउ बिसवास नाही करत, तउ उ मनई परमेस्सर क झूठा साबित करत ह। काहेकि उ परमेस्सर क अपने पूत क बावत दीन्ह साच्छी मँ बिसवास नाही किहेस।<sup>११</sup> अउर उ साच्छी आटै कि परमेस्सर हमका अनन्त जीवन देहे अहइ। अउर उ जीवन ओकरे पूत (ईसू) मँ मिलतह।<sup>१२</sup> जउन मनई ओहके पूत क धारन करत ह, उ उही जीवन क धारन करतह। मुला जेकरे पास परमेस्सर क पूत नाही अहइ, ओकरे पास उ जीवनौ नाही अहइ।

अब अनन्त जीवन हमार अहइ

१३ परमेस्सर मँ बिसवास करइवालो, तोहका इ बातिन क मई इ बरे लिखत अहउँ जइसेन कि तू जानि ल्या कि अनन्त जीवन तोहरे पास अहइ।

१४ हमार परमेस्सर मँ इस बिसवास अहइ कि जदि हम ओकरी इच्छा क पालन करत ओसे पराथना करी तउ उ हमार पराथना सुनत ह,<sup>१५</sup> अउर जब हम जानित ह कि उ हमार सुनत ह ओसे हम चाहे जउन माँगी-तउ हम इहइ जानित ही कि हम जउन कछू माँगित ही, उ हमार होइ जात ह।

१६ जदि कउनो देखत ह कि ओकर भाई कउनो अइसा पाप करत अहइ जेकर फल अनन्त मउत नाही अहइ, तउ ओका अपने भाई क बावत पराथना करइ चाही। परमेस्सर ओका जीवन देइ। मई ओनके बरे जीवन क वात करत अही, जउन कि अइसे पाप मँ लगा अहई जउन ओनका अनन्त मउत तक न पहुँचा। अइसउ पाप होत ह, जेकर फल मउत अहइ। मई तोहसे अइसे न पाप क बरे पराथना करइ बरे नाही कहत अहउँ।<sup>१७</sup> सबइ बुरा काम पाप अहइ। मुला अइसा पाप भी होत ह जउन अनन्त मउत क तरफ नाही लइ जात।

१८ हम जानित ह कि जे केहू परमेस्सर क पूत बन गवा, उ पाप नाही करत। परमेस्सर क पूत ओकइ रच्छा करत ह।<sup>१९</sup> उ दुस्त सइतान ओकर कछू बिगाड़ नाही सकत।<sup>२०</sup> हम जानित अही कि हम परमेस्सर क अही। वइसेन इ पूरी दुनिया उ दुस्त (सइतान) क बस मँ अहइ।<sup>२१</sup> मुला हमका पता अहइ कि परमेस्सर क पूत आइ गवा अहइ अउर उ हमका अइसा गियान दिहे अहइ जइसे कि हम उ परमेस्सर क जान लेई जउन सच्चाई अहइ। हम सबे उही मँ स्थित अही जउन सच्चाई अहइ, काहेकि हम ओकर पूत ईसू मसीह मँ स्थित अही। परमपिता सच्चा परमेस्सर अहइ अउर उ अनन्त जीवन भी अहइ।<sup>२२</sup> पिआरे बच्चो, अपने आप क झूठे देवता लोगन स दूर राखा।

<sup>१५</sup> १८ परमेस्सर ... करत ह मुला रहत ह सबत क अरथ, "जउन परमेस्सर स पइदा भवा ओका उ बचाए रखत ह।" या "अपने आप क बचाए राखत ह।"